

## IXLIAKTUTU IXCARTA SAN JUAN

### Canihuá tlan lichihuincán Gayo

**1** <sup>1</sup> Aquit xapuxcu korojtzin Juan ctzoknanimán huix tlan quiamigo Gayo y cacatzi xlacata cpaqxuiyán xlicana ixlihuak quinacú.

<sup>2</sup> Litacam Gayo, cmaksquín litlán Dios xlacata tlan calatapa nitú nakalhiyán tátat, porque clacasquín lipaxáu nalatapaya nac mimacni na chuná la lipaxáu latapaya nac milistacni. <sup>3</sup> Snun xlicana cpaáhualh acxni quintalakpaxialhnalh makapitzi quinatacamancán y quintamakalhchihuínih la huix tancs makachaxípat ixtalacasquín Dios y makantaxtípat nac milatamat. <sup>4</sup> Y xlicana ni huí tú mas quimakapaxahuá acxni ccatzi xlacata huak tí ccalimacán la quincamán tancs tamakantaxtí ixtalacasquín Dios nac xilatamátcan.

<sup>5</sup> Litacam Gayo, na cpaaxahuá acxni ckaxmata xlacata siempre lacputzaya la nacatlahuaniya litlán tí na talipahuanit Dios la huix, y na chuná ni catzonkcatzaniya tí talakpaxialhnanán y huak camaktayaya tí talichihuinantapulí Dios xala alacatunu pulataman. <sup>6</sup> Pues xlacán acxni tachín juú nac chiqui ní ctamakstokáu quincalimakalhchihuinanán mintalakalhamán nima camaxquiya. Chí cmaksquinán litlán cacamaktaya tí talín jaé carta cacamaxqui tú tamaclacasquín nac tijia xlacata nitú nacatzankaní y tlan natachán ní tamana y Dios nalipaxahuá huak mintascújut nima tlahuaya. <sup>7</sup> Xlacán na taliscujmana ixtachihuín Jesucristo huá xlacata talayana nac tijia, pero xlacán ni tamatlaní nacamaxquí tumín tú natalihuayán amá tí ni talipahuán Dios. <sup>8</sup> Huá xlacata tamaclacasquiní xlacata aquín tí lipahuanáu Dios nacamaktayayáu y chuná xlicana tatayayáu nac ixtascujutcán la natamakahuaní ixtachihuín Dios.

### Ni tlan ixkásat Diótrefes

<sup>9</sup> Cmalakáchalh aktum quincarta ana ní tatamakstoka tí talakachixcuquí Dios nac mimpulataman pero Diótrefes tí siempre lakatí huata xlá nacapuxcún tí talipahuán Cristo ni matlaní xlacata tú aquit ccalimapaksí catatláhuah. <sup>10</sup> Huá jaé xlacata para sok nacanachá calakpaxialhnanán titum naclakchán xlacata naclakakahuaní la xlá ixkásat porque catuhá quiliyahuama tú ni chuná. Y ni huata aquit chú quintlahuá sino que acxni taán calakpaxialhnán tí talichihuinamputún ixtachihuín Dios ni camaklhtinán y calihuaní lata tí camaklhtinamputún y catantlakaxtú nac pusiculan.

<sup>11</sup> Litacam Gayo, nicxni camakslhueke ni tlan ixtalacapastacni tú tlahuá Diótrefes, sino que huix huata camakslhueke tí acxila tlahuama tú tlan y tlan catzí. Cacatzi xlacata huata tí tlan catzí y tlahuá tú tlan tí

makachaxinít ixtalacapaścacni Dios, pero amá tí huata lakatí tlahuá tú nī tlan quítaxtú nīcxni makachaxinít ixtalacapaścacni.

### Snun tlan ixtalacapaścacni Demetrio

<sup>12</sup> Pero nī chuná ixtalacapaścacni Demetrio porque canihuá tlan lichihuīnancán, y nī lá tí mamaxaní porque ixlatámat limalacahuānínán y aquín nā chuná cmalulokáu xlacata xlicana lata jaé tú lichihuīnancán y huixín nā acxilhnítántit xlacata xlicana tú clīchihuīnama.

<sup>13</sup> Lhuhucú tú mas ccahuaniputunán pero yaj clitzokputún quimacán tú nacuaniputunán <sup>14</sup> porque aquit sok camputunachá lakpaxialhnanán xlacata nakalhchihuīnanáu calacán.

<sup>15</sup> Dios cacxilhlacachán y tlan calatapa. Lhuhua militalakapasni xala jaé pulataman talacasquín nacuaniyán kalhén ixlakapuxokocán, y catlahua litlán nā cacahuanipi kalhén quilakapuxoko chatunu quiamigos tí talamananchá.